

四庫全書

子部

欽定四庫全書

普濟方卷十二

明周王朱橚撰

運氣圖

甲寅歲圖



少陽相火司天厥陰風木在泉中見太宮土運歲土太
過氣化運行先天火化在上清化左齡化右酸化在下灼
化左藏化右故天氣正而其政嚴地氣擾而其令撓風迺
暴舉木偃沙飛炎火迺流陰行陽化雨迺時應風熱參
布雲物沸騰太陰橫流寒迺時至涼雨並起火化二雨
化五風化八正化度也火木同德上應熒惑歲星其穀
丹蒼羽蟲靜毛蟲育是謂歲物所宜保蟲耗清毒不生
是皆地氣所至民病寒中外發瘡瘍內為泄滿聖人遇

之和而不爭往復之作民病寒熱瘡泄聾瞶嘔吐上怫
腫色變是歲陽為天氣陰為地氣天氣盈地氣虛宜先
取化源以平火氣抑其運土贊所不勝則暴過不生苛
疾不起歲宜醎宜辛宜酸滲之泄之漬之發之觀氣寒
溫以調其過運異風熱宜少用寒化其化上醎寒中醎
和下辛涼藥食宜也歲行土運天氣生運歲半之前天
氣主之火淫所勝則溫氣流行金政不平民病頭痛發
熱惡寒而瘡熱上皮膚痛色變黃赤傳而為水身面肘

腫腹滿仰息泄注赤白瘡瘍欬唾血煩心胸中熱甚則
軌衄病本於肺診在手天府之脉其法平以鹹冷佐以
苦甘以酸收之以苦發之以酸復之歲半之後地氣主
之風淫所勝則地氣不明平野昧草迺早秀民病灑灑
振寒善呻數欠心痛支滿兩脇裏急飲食不下膈咽不
通食則嘔腹脹善噫得後與氣則快然如衰身體皆重
其法治以辛涼佐以苦甘以甘緩之以辛散之歲運之化
紀曰敦阜是謂廣化厚德清靜順長以盈至陰內實物

化充成煙埃朦鬱見於厚土大雨時行濕氣迺用燥政
迺辟其化圓其氣豐其政靜其令周備其動濡積并穡
其德柔順重淖其變震驚飄驟其化兼其所勝其病腹
滿清厥噫不樂體重煩寃甚則肌肉萎足痿不收行善
癰脚下痛飲發中滿食減四肢不舉變生得位藏氣伏
化氣獨治之泉涌河衍涸澤生魚風雨大至土潰鱗見
於陸病腹滿溇泄腸鳴反下甚而太谿脉絕者不治其
法宜以醎和調中初之氣自癸丑年大寒日申初至是

歲春分日酉初凡六十日八十七刻半主位太角木客
氣少陰火中見土運木生火地氣遷風勝迺搖寒迺去
候迺大溫草木早榮寒來不殺溫病迺起其病氣怫於
上血溢目赤欬逆頭痛脇滿膚腠中瘡宜治少陰之客
以醎補之以甘瀉之以酸收之歲穀宜丹間穀宜豆雖
有熱邪不能為害二之氣自春分日酉正至小滿日辰
正凡六十日有奇主位少徵火客氣太陰土中見土運
氣與運同司氣與運同司氣為齡化火反鬱白埃四起


雲趨雨府風不勝濕雨迺零民迺康其病熱鬱於上欬
逆嘔吐瘡發於中胸噎不利頭痛身熱昏憤膿瘡宜治
太陰之客以甘補之以苦瀉之以甘緩之歲穀宜丹間
穀宜麻雖有濕邪不能為害是氣也無犯司氣三之氣
自小滿日已初至大暑日卯初凡六十日有奇主位少
徵火客氣少陽火中見土運火居其位天政布炎暑至少
陽臨上雨迺涯民病熱中聾瞑血溢膿瘡欬逆嘔吐軌
衄渴嚏欠喉痺目赤善暴死宜調少陽之客以鹹補之

以甘瀉之以醎炙之歲穀宜丹間穀宜豆雖有火化不能為害四之氣自大暑日卯正至秋分日丑正凡六十日有奇主位太宮土客氣陽明金中見土運歲土當位涼乃至炎暑間化白露降民氣和平其病滿身重宜調陽明之客以酸補之以辛瀉之以苦泄之歲穀宜蒼間穀宜黍雖有燥邪不能為害五之氣自秋分日寅初至小雪日子初凡六十日有奇主位少商金客氣太陽水中見土運寒溫相交陽乃去寒迺來雨迺降氣門迺閉剛木早

涓民病寒邪君子周密宜調太陽之客以苦補之以鹹
瀉之以苦堅之以辛潤之歲穀宜蒼間穀宜稷雖有寒
不能為害終之氣自小雪日子正至大寒日戌正凡六十
日有奇主位太羽水客氣厥陰木中見土運木制土地
氣正風迺至萬物反生霧霧以行其病關閉不禁心痛
陽氣不藏而欬宜治厥陰之客以辛補之以酸瀉之以
甘緩之歲穀宜蒼間穀宜稻雖有風邪不能為害歲氣
之交天氣勝者陽明復之觀其復至無翼其勝無贊其

復依法為治寒者熱之清者溫之各安其氣則邪氣衰
去歸其所宗此治之大體也

乙卯歲圖



陽明燥金司天少陰君火在泉中見少商金運歲不及
氣化運行後天少商上臨陽明少商與正商同不及而
同天化是謂天符氣之平也平金之歲命曰審平之紀
收而不爭殺而無犯五化宣明其氣潔其性剛其用散
落其化堅斂其政勁肅其候清切其令燥其類金其應
秋其穀稻其果桃其實穀其蟲介其畜雞其色白其味
辛其音商其數九其物外堅其也在人也其藏肺其主鼻
其養皮毛其病欬此歲運之化也天地之氣陽明在上

左太陽右少陽故天氣急而其政切少陰在下左太陰
右厥陰故地氣明而其令暴陽專其令炎暑盛行物燥
以堅淳風迺治風燥橫運流於氣交多陽少陰雲趨雨
府濕化迺敷燥極而澤蟄蟲迺見流水不冰金火合德上
應太白熒惑其穀白丹間穀命太^缺者其耗白甲品羽故
熱化寒化勝腹同邪氣化度也燥化四清化四熱化二
正化度也歲物之宜介蟲靜羽蟲育地氣所制介蟲耗
寒毒不生清熱之氣持於氣交清先而勁毛蟲迺死熱

後而暴介蟲迺殃其發燥民病欬喘塞寒熱發暴振慄
癰悶歲半之前清氣主之其化燥者天之政也歲半之
後熱氣主之其化熱者地之令也金為天氣火為地氣
火勝金天氣虛當資金之化源是歲氣平不資化源惟
安其運金無使受邪食白丹之穀以去其邪歲宜以醎
以苦以辛汗之清之散之其運與清化同宜多地化經
曰其化上苦小溫中苦和下醎寒藥食之宜也初之氣
自甲寅年大寒日亥初至是歲春分日酉初凡六十日


八十七刻半主位太角木客氣太陰土中見金運地氣
迺遷陰始凝氣始肅水迺冰寒雨化其病中熱脹面目
浮善眠飢餒欠嘔小便黃赤甚則淋宜調太陰之客
以甘補之以苦瀉之以甘緩之歲穀宜白間穀宜黍則
熱不為邪是氣也用涼遠涼無犯司氣之涼二之氣自春分
日酉正至小滿日未正凡六十日有奇主位少徵火客
氣少陽火中見火運陽乃布民乃舒物乃生榮厲大至
民善暴死宜調少陽之客以鹹補之以甘瀉之以鹹要

之以酸收之歲穀宜丹間穀宜豆則火不為邪三之氣
自小滿日申初至大暑日午初凡六十日有奇主位太
徵火客氣陽明金中見土運天政布涼乃行燥熱交合
燥極而澤民病寒熱宜調陽明之客以酸補之以辛瀉
之以苦泄之歲穀宜薥間穀宜稷則燥不為邪四之氣
自大暑日午正至秋分日辰正凡六十日有奇主位太
宮土客氣太陽水中見金運金生水寒雨降民病暴仆振
慄譫妄少氣噤乾引飲及為心痛癰腫瘡瘍瘧寒之疾

骨痿血便宜調太陽之客以苦補之以鹹瀉之以苦堅
之以辛潤之歲穀宜丹間穀宜稷則寒不為邪五之氣
自秋分日已初至小雪日卯初凡六十日有奇主位少
商金客氣厥陰木中見金運風木用事春令反行草迺
生榮民迺和宜調厥陰之客以辛補之以酸瀉之以甘
緩之歲穀宜丹間穀宜稻則風不為邪終之氣自小雪
日卯正至大寒日丑正凡六十日有奇主位太羽水客
氣少陰火中見金運火勝金陽氣布候反溫蟄蟲來見

流水不冰民迺康平其病溫宜調少陰之客以鹹補之
以甘瀉之以酸收之歲穀宜丹間穀宜豆則熱不為邪
此六氣之常也是歲天符為執法若有邪氣民病卒急
經曰邪中執法者其病速而危

丙辰歲圖



太陽寒水司天太陰濕土在泉中見太羽水運歲水太
過氣化運行先天太過而同天化是謂天符平水之歲
也水運平者命曰靜順之紀藏而勿害治而善下五化
咸整其氣明其性下其用沃衍其化凝堅其政流演其
候凝肅其令寒其類水其應冬其穀豆其果栗其實濡
其蟲鱗其畜羴其色黑其味鹹其音羽其數六其物濡
其在人也其藏腎其主二陰其養骨髓其病厥此歲運
之化也天地之氣太陽在上左厥陰右陽明故天政所

布其氣肅太陰在下左少陽右少陰故地氣靜而其令
徐寒臨太虛其政大舉陽氣不令澤無陽燄則火發待
時少陽中治時雨迺涯止極雨散還於太陰雲朝北極
濕化迺布澤流萬物寒化六雨化五正化度也鱗蟲靜
裸蟲育歲物之宜也鱗蟲不成燥毒不生地氣制之也
寒敷于上雷動於下水土合德上應辰星鎮星其穀玄
齡寒濕之氣持於氣交民病寒濕發肌肉萎足痿不收
濡瀉血溢是歲水在上土在下土勝水天氣虛水運天

符其氣自平不資化源惟抑運水扶其不勝無使暴過而生其疾歲宜以苦燥之溫之食玄穀之穀以全其真避虛邪之氣以安其正運與寒同宜燥熱化故曰其化上苦熱中鹹溫下甘熱藥食宜也歲半之前太陽主之有本標之化當其時寒熱得中者天之和也歲半之後太陽主之太陰之化從本當其時濕化應者地之令也初之氣自乙卯年大寒日寅初至是歲春分日子初凡六十日八十七刻半主位太角木客氣少陽火中見


水運少陽中治地氣遷氣迺大溫草迺早榮民迺厲溫
病迺作身熱頭痛嘔吐肌腠瘡瘍宜調少陽之客以醎
補之以甘瀉之以醎奠之歲穀宜玄間穀宜豆則火不
為邪二之氣自春分日子正至小滿日戌正凡六十日
有奇主位少徵火客氣陽明金中見水運大涼反至民
迺慘草迺遇寒火氣遂抑民病氣鬱中滿寒迺始宜調
陽明之客以甘補之以辛瀉之以苦泄之歲穀宜玄間
穀宜黍則燥不為邪三之氣自小滿日亥初至大暑日

酉初凡六十日有奇主位少徵火客氣太陽水中見水
運氣與運相符天政布寒氣行雨迺降民病寒反熱
中癰疽注下心熱瞋悶不治者死宜調太陽之客以苦
補之以鹹瀉之以苦堅之以辛潤之歲穀宜玄間穀宜
稷則寒不為邪是氣也用寒遠寒無犯司氣之寒四之
氣自大暑日酉正至秋分日未正凡六十日有奇主位
太宮土客氣厥陰木中見水運水生木風濕交爭風化
為雨迺長迺化迺成民病大熱少氣肌肉萎足痿注下

赤白宜調厥陰之客以辛補之以甘瀉之以甘緩之歲
穀宜齡間穀宜稻則風不為邪五之氣自秋分日申初
至小雪日午初凡六十日有奇主位少商金客氣少陰
火中見水運大火所居陽復化草迺長迺化迺成民迺舒
宜調少陰之客以鹹補之以甘瀉之以酸收之歲穀宜
齡間穀宜豆則熱不為邪終之氣自小雪日午正至大
寒日辰正凡六十日有奇主位太羽水客氣太陰土中
見水運水運得位濕土居之地氣正濕令行陰凝太虛

埃昏郊野民迺慘悽寒風以至反者孕迺死宜調太陰
之客以甘補之以苦瀉之以甘緩之歲穀宜齡間穀宜
麻則濕不為邪此六氣之化也歲行平水之化天符為
執法邪或中之民有卒急之病故經曰中執法者其病
速而危

圖 歲 巳 丁



厥陰風木司天少陽相火在泉中見少角木運歲木不
及上角與正角同又木不及而同天化氣化運行同天
氣與天符木氣適平命曰敷和之紀木德周行陽舒陰
布五化宣平其氣端其性隨其用曲直其化生榮其政
發散其候溫和其令風其類草木其應春其穀麻其果
李其實核其蟲毛其畜犬其色蒼其味酸其音角其數
八其物中堅其在人也其藏肝其主目其養筋其病裏
急支滿此歲運之化也天地之化風化在上左灼化右

藏化故天氣擾而其政撓苦化在下左清化右柔化故地氣正而其令速風生高遠炎熱從之雲趨雨府濕化迺行風火同德上應歲星熒惑其穀蒼丹間穀言太商之穀其耗文角品羽清化熱化勝復同邪氣化度風化三火化七政化度也毛蟲靜羽蟲育是迺歲物所宜介蟲耗寒毒不生是皆地氣所制故風燥火熱勝復更作蟄蟲來見流水不冰熱病行於下風病行於上風燥勝復行於中是陰為天氣陽為地氣天氣虛木運符之又木

火同德其氣專不資化源惟贊運木無使邪勝歲宜以
辛調上以鹹調下畏火之氣無妄犯之故曰其化上辛
涼中辛和下鹹寒藥食宜也歲半之前天氣主之天布
厥陰之政其令風歲半之後地氣主之地行少陽之令
其化火氣化之常也初之氣自丙辰年大寒日巳初至
是歲春分日卯初凡六十日八十七刻半主位少角木
客氣陽明金中見木運歲運得位金燥客之寒始肅殺氣方
至民病寒於右之下宜調陽明之客以酸補之以辛瀉


之以苦泄之歲穀宜蒼間穀宜黍則燥不為邪二之氣
自春分日卯正至小滿日丑正凡六十日有奇主位太
徵火客氣太陽水中見木運寒不去華雪水冰殺氣施
化霜迺降谷草上焦寒雨數至陽復化民病熱中宜調
太陽之客以苦補之以鹹瀉之以苦堅之以辛潤之歲
穀宜蒼間穀宜稷則寒不為邪三之氣自小滿日寅初
至大暑日子初凡六十日有奇主位太徵火客氣厥陰
木中見木運木與天符天政布風迺時舉民病泣出耳

鳴掉眩宜調厥陰之客以辛補之以酸瀉之以甘緩之
歲穀宜蒼間穀宜稻則風不為邪是氣也用溫遠溫無
犯司氣之溫四之氣自大暑日子正至秋分日戌正凡
六十日有奇主位少宮土客氣少陰火中見木運溽暑
濕熱相薄爭於左之上民病黃痺而為胕腫宜調少陰
之客以鹹補之以甘瀉之以酸收之歲穀宜丹間穀宜
豆則熱不為邪五之氣自秋分日亥初至小雪日酉初
凡六十日有奇主位太商金客氣太陰土中見木運燥

濕更勝沉陰迺布寒氣及體風雨迺行宜調太陰之客
以甘補之以苦瀉之以甘緩之歲穀宜丹間穀宜麻則
濕不為邪終之氣自小雪日酉正至大寒日未正凡六
十日有奇主位少羽水客氣少陽火中見木運木生火
畏火司令陽迺大化蟄蟲出見流水不冰地大發草迺
生人迺舒其病溫厲宜調少陽之客以鹹補之以甘瀉
之以鹹熯之歲穀宜丹間穀宜豆則火不為邪此六氣
之化也歲為平木或有邪氣則中執法人有卒急之病

故經曰中執法者其病速而危

戊午歲圖



少陰君火司天陽明燥金在泉中見太徵火運歲火太過而同天化是謂天符又火運臨午是謂歲會氣之平也上見天符下見歲會三合而治太一天符之會平之至也平火之歲命曰升明之紀正陽而治德施周普五化鈞衡其氣高其性速其用燔灼其化蕃茂其政明曜其候炎暑其令熱其類火其應夏其穀麥其果杏其實絡其蟲羽其畜馬其色赤其味苦其物脉其音徵其數七其在人也其藏心其主舌其養血其病暱癰此歲運

之化也少陰在上左太陰右厥陰故天政所布其氣明
陽明在下左太陽右少陽故地氣肅而其令切寒交暑
熱加燥雲馳雨府濕化迺行時雨迺降金火合德上應熒惑
太白其穀丹白熱化七清化九正化度也羽蟲靜介蟲
育歲物所宜也毛蟲耗濕毒不生地氣制之也水火寒
熱持於氣交而為病始熱病行於上清病生於下寒熱爭
於中民病欬喘血溢白泄鼽嚏目赤眚瘍寒厥入胃心
痛腰痛腹大噎乾腫上是歲火在上金在下火在中火

勝金天氣盈天氣雖平熱甚於上宜於年前十二月先
取化源平其火氣必抑其運火資其歲勝折其金之鬱
氣無使暴過而生其病食丹白之穀以全真氣食間氣
之穀以辟羣邪歲宜醎以奠之而安其上以酸收之而
安其下運同天氣以寒清化故曰其化上醎寒中甘寒
下酸溫藥食宜也歲半之前少陰主之少陰有本標之
化寒熱得中者天政之平也歲半之後陽明主之陽明
以中氣為化燥令相半者地之令也初之氣自丁巳年

大寒日申初至是歲春分日午初凡六十日八十七刻
半主位少角木客氣太陽水中見火運水勝火地氣遷
燥將去寒迺始熱復藏水迺冰霜復降風迺至陽氣鬱
民反周密關節禁固腰膝痛炎暑將起中外瘡瘍宜調
太陽之客以苦補之以鹹瀉之以苦堅之以辛潤之歲
穀宜丹間穀宜稷則寒不為邪二之氣自春分日午正
至小滿日辰正凡六十日有奇主位太徵火客氣厥陰木
中見火運水火相生陽氣布風迺行春氣以正萬物應

榮寒氣時至民迺和其病淋目瞑目赤氣鬱上而熱宜
調厥陰之客以辛補之以酸收之以甘緩之歲穀宜丹
間穀宜稻則風不為邪三之氣自小滿日巳初至大暑
日卯初凡六十日有奇主位太徵火客氣少陰火中見
火運氣與運符天政布大火行庶類蕃鮮寒氣時至民
病氣厥心痛寒熱更作欬喘目赤宜調少陰之客以鹹
補之以甘瀉之以酸收之歲穀宜丹間穀宜豆則熱不
為邪四之氣自大暑日卯正至秋分日丑正凡六十日

欽定四庫全書


普濟方
卷十二

三

有奇主位少宮土客氣太陰土中見火運土當其位火
化兼之溽暑至大雨時行寒熱互至民病寒熱噤乾黃
痺飢飢飲發宜調太陰之客以甘補之以苦瀉之以甘
緩之歲穀宜白間穀宜麻則濕不為邪五之氣自秋分
日寅初至小雪日子初凡六十日有奇主位太商金客
氣少陽火中見火運氣同運化畏火臨暑反至陽迺化
萬物迺生迺長迺榮民迺康其病溫宜調少陽之客以鹹
補之以甘瀉之以鹹乘之歲穀宜白間穀宜豆則火不

為邪是氣也用熱遠熱無犯司氣之熱終之氣自小雪日子
正至秋分日戌正凡六十日有奇主位少羽水客氣陽明金
中見火運火勝金水反制之燥令行餘火內格腫於上欬喘
甚則血溢寒氣數舉則霧霧翳病生皮腠內舍於脇下連少
腹而作寒中地將易也宜調少陽之客以酸補之以辛瀉之
以苦泄之歲穀宜白間穀宜黍則燥不為邪此六氣之化也
歲氣之交平火在上金氣抑鬱治宜泄之客安其氣必清必
靜則邪氣自衰歸其所宗此治之大體也

已未歲圖



太陰濕土司天太陽寒水在泉中見少宮土運歲土
不及上宮與正宮同少宮上臨太陰是謂天符土運臨
丑是謂歲會上見天符下見歲會三合為治太一天
符之歲氣至平也命曰備化之紀氣協天休德流四政
五化齊脩其氣平其性順其用高下其化豐滿其政安
靜其候溽蒸其令濕其類土其應長夏其穀稷其果棗
其實肉其蟲裸其畜牛其色黃其味甘其物膚其音宮
其數五其也在人也其藏脾其主口其養肉其病痞此歲

運之化也歲氣之化太陰在上少陽左少陰右故地氣
上騰而其政肅太陽在下厥陰左陽明右故天氣下降而其
令寂陰專其政陽氣退辟大風時起原野昏霧白埃四
起雲奔南極寒雨數至濕寒合德黃黑埃昏流行氣交
上應鎮星辰星其穀斡玄間穀命太商太徵者物成於
差夏故陰凝於上寒積於下寒水勝火則為冰電陽光
不治殺氣迺行有餘宜高不及宜下有餘宜晚不及宜
早土之利氣之化也民氣亦從之其病寒濕腹滿身臃

憤附腫痞逆寒厥拘急故曰風化勝復同邪氣化度也
雨化五寒化一正化度也保蟲靜鱗蟲育歲物所宜也
羽蟲耗濕毒不生地氣制之也是歲土在上水在下土
勝水天氣盈當取化源歲遇太一天符其氣至平不取
化源惟折其水鬱益其歲勝贊其陽火令禦甚寒無使
邪勝食齡玄之穀以全其真食間氣之穀以保其精歲
宜以苦燥之濕之運與濕同宜以燥化故曰其化上苦
熱中甘和下甘熱藥食宜也歲半之前其政濕歲半之


後其令寒初之氣自戊午年大寒日亥初至是歲春分日酉初凡六十日八十七刻半主位少角木客氣厥陰木中見土運木當其位地氣遷寒過去春氣正風迺來生布萬物以榮民氣條舒風濕相搏雨迺後民病血溢經絡拘強關節不利身重筋痿宜調厥陰之客以辛補之以酸瀉之以甘緩之歲穀宜穀間穀宜稻則風不為邪二之氣自春分日酉正至小滿日未正凡六十日有奇主位太徵火客氣少陰火中見土運大火正物承化

民迺和其病溫厲盛行遠近咸若濕蒸相搏雨迺時降
宜調少陰之客以鹹補之以甘瀉之以酸收之歲穀宜
穀間穀宜豆則熱不為邪三之氣自小滿日申初至大
暑日午初凡六十日有奇主位太徵火客氣太陰土中
見土運氣與運符而行平氣天政布濕氣降地氣騰雨
迺時降寒迺隨之感於寒濕則民病身重肘腫胸腹滿
宜調太陰之客以甘補之以苦瀉之以甘緩之歲穀宜
穀間穀宜麻則濕不為邪是氣也無犯司氣四之氣自

大暑日午正至秋分日辰正凡六十日有奇主位少宮土客氣少陽火中見土運歲運得位相火居之畏火臨瀆蒸化地氣騰天氣否隔寒風曉暮蒸熱相搏草木凝煙濕化不流則白露陰布以成秋令民病腠理熱血暴溢瘡心腹滿熱臃脹甚則肘腫宜調少陽之客以鹹補之以甘瀉之以鹹奠之歲穀宜玄間穀宜豆則火不為邪五之氣自秋分日巳初至小雪日卯初凡六十日有奇主位太商金客氣陽明金中見土運土生金金得位慘令已行

寒露下霜迺早降草木黃落寒氣及體君子周密民病皮腠宜調陽明
之客以酸補之以辛瀉之以苦泄之歲穀宜玄間穀宜黍則燥不為邪
終之氣自小雪日卯正至大寒日丑正凡六十日有奇主位少羽水客
氣太陽水中見土運土當其位濕土合氣寒大舉濕大化霜迺積陰迺
凝水堅冰陽光不治感於寒則病人關節禁固腰膝痛寒濕持於氣交
而為疾也宜調太陽之客以苦補之以鹹瀉之以苦堅之以辛潤之歲
穀宜玄間穀宜稷則寒不為邪此六氣之化也氣交之化歲有鬱治宜
折之皆隨勝氣安其屈伏無問其數以平為期此其道也

庚申歲圖



少陽相火司天厥陰風木在泉中見太商金運歲金太
過氣化運行先天上見少陽左陽明右太陰故天氣正
而其政嚴下見厥陰左少陰右太陽故地氣擾而其令撓
風迺暴舉木偃沙飛炎火迺流陰行陽化雨迺時應風
熱參布雲物沸騰太陰橫流寒迺時至涼雨並起火木
同德上應熒惑歲星其穀丹蒼火化七清化九風化三
正化度也羽蟲靜毛蟲育是謂歲物之宜保蟲耗清毒
不生是皆地氣所制民病寒中外發瘡瘍內為泄滿聖

人遇之和而不爭往復之作民病寒熱瘧泄聾瞑嘔吐
上怫腫色變是歲陽為天氣陰為地氣金運在中天氣
刑運運刑地氣天氣盈地氣虛當於年前先取化源以
平火氣無使運鬱無抑其運金贊所不勝無使木鬱氣
則暴過不生苛疾不起歲宜醎宜辛宜酸滲之泄之漬
之發之運翼風熱少用寒化其化上醎寒中辛溫下辛
涼藥食宜也候其氣者歲半之前其主少陽若火淫所
勝則溫氣流行金政不平民病頭痛發熱惡寒而瘧熱

上皮膚痛色變黃赤傳而為水身面跗腫腹滿仰息
泄注赤白瘡瘍欬唾血煩心胸中熱甚則衄衄病本於
肺診在手天府之脉法宜平以鹹冷佐以苦甘以酸收
之以苦發之以酸復之歲半之後其主厥陰若風淫於
內則地氣不明平野昧草迺早秀民病灑灑振寒善呻
數欠心痛支滿兩脇裏急飲食不下膈咽不通食則嘔
腹脹善噫得後與氣則快然如哀身體皆重法宜治以
辛涼佐以苦以甘緩之以辛散之歲運之金太過紀曰

堅成是謂收引天氣潔地氣明陽氣隨陰治化燥行其
政物以司成收氣繁布化洽不終其化成其氣削其政
肅其令銳切其動暴折瘍疰其德霧露蕭飄其變肅殺
凋零其化蕪其所勝其病喘喝胸憑仰息上徵與正商
同其生齊其病欬故曰歲金太過燥氣流行肝木受邪
民病兩脇下少腹痛目赤痛皆瘍耳無所聞甚則欬逆
喘氣肩背痛下連股膝髀腠足皆病其治宜以辛溫
所以調其運也初之氣自己未年大寒日寅初至是歲

春分日子初凡六十日八十七刻半主位少角木客氣
少陰火金運統之火能勝金地氣遷風勝迺搖寒迺
去候迺大溫草木早榮寒來不殺溫病迺起其病氣怫
於上血溢目赤欬逆頭痛血崩脇滿膚腠中瘡宜治少
陰之客以鹹補之以甘瀉之以酸收之歲穀宜丹間穀
宜豆二之氣自春分日子正至小滿日戌正凡六十日
有奇主位太徵火客氣太陰土金運統之火生土土甚
鬱火白埃四起雲趨雨府風不勝濕雨迺零民迺康其

病熱鬱於上欬逆嘔吐瘡發於中胸噎不利頭痛身熱昏
憤膿瘡宜治太陰之客以甘補之以苦瀉之以甘緩之
歲穀宜丹間穀宜麻三之氣自小滿日亥初至大暑日
酉初凡六十日有奇主位太徵火客氣少陽火金運統
之火當其位天政布炎暑至少陽臨上雨迺涯民病熱
中聾瞋血溢膿瘡欬嘔衄渴嚏欠喉痺目赤善暴死
宜治少陽之客以鹹補之以甘瀉之以鹹熈之歲穀宜
丹間穀宜豆四之氣自大暑日酉正至秋分日未正凡

六十日有奇主位少宮土客氣陽明金運統之氣與
運同是謂司氣陽迺至炎暑間化白露降民氣和平
其病滿身重宜治陽明之客以酸補之以辛瀉之以
苦泄之歲穀宜蒼間穀宜黍是氣也司氣以涼藥食
之宜用涼無犯五之氣自秋分日申初至小雪日午
初凡六十日有奇主位太商金客氣太陽水金得其
位與水相生陽迺去寒迺來雨迺降氣門迺閉剛木
早凋民病寒邪君子周密宜治太陽之客以苦補之

以鹹瀉之以苦堅之以辛潤之歲穀宜蒼間穀宜稷
終之氣自小雪日午正至大寒日辰正凡六十日有
奇主位少羽水客氣厥陰木金運統之金本刑木水
反生之地氣正風迺至萬物反生霧露以行其病關
閉不禁心痛陽氣不藏而欬宜治厥陰之客以辛補
之以鹹瀉之以甘緩之歲穀宜蒼間穀宜稻歲氣之
交天氣火勝即太陽來復地氣木勝即陽明來復觀
其氣至治以勝復之法寒者熱之清者溫之無翼其

甚無贊其復是謂至治

辛酉歲圖



陽明燥金司天少陰君火在泉中見少羽水運歲水不
及氣化運行後天陽明在上太陽左少陽右故天氣急
而其令切少陰在下太陰左厥陰右故地氣明而其令
暴陽專其令炎暑盛行物燥以堅淳風迺治風燥橫運
流於氣交多陽少陰雲趨雨府濕化迺敷燥極而澤金火
合德上應太白熒惑其穀白丹間穀命太徵者其耗白
甲品羽雨化風化勝復同邪氣化度也清化九寒化一
熱化七正化度也介蟲靜羽蟲育是乃歲物之宜介蟲

耗寒毒不生是皆地氣所制蟄蟲出見流水不冰清熱之氣持於氣交民病咳喘寒熱發暴振慄瘡悶清先而勁毛蟲迺死熱後而暴介蟲迺死其發燥是歲金在上火在下水運在中水勝火火勝金天氣虛水能制火而生金其邪迺微宜資其化源以助金氣安其水運無使受邪折其火氣之鬱食白丹之穀以安其氣食間氣之穀以去其邪歲宜以醎以苦以辛汗之清之散之運化同清宜多地化其化上苦小溫中苦和下醎寒藥食宜

也候其清者歲半之前陽明主之燥淫所勝則木迺晚
榮草迺晚生筋骨內變民病左胠脇痛寒清於中感而
瘡大涼革候欬腹中鳴注泄驚澹名木斂生苑於下
草焦上首心脇暴痛不可反側噤乾面塵腰痛目昧瘡
瘍痠癰病本於肝診在足太衝之脉法宜平以苦溫佐
以酸辛以苦下之歲半之後少陽主之熱淫於內則焰
浮川澤陰處反明民病腹中常鳴氣上衝胸喘不能久
立寒熱皮膚痛目瞑齒痛頰腫惡寒發熱如瘧少腹中

痛腹大法宜治以鹹寒佐以甘苦以酸收之以苦發之
氣交之間水運統之涸流之紀是謂反陽藏令不舉化
氣迺昌長氣宣布蟄蟲不藏土潤水泉減草木條茂榮
秀滿盛其氣滯其用滲泄其動堅止其發燥稿其藏腎
其化無所不勝其病癰閔邪傷腎也候其氣者四維有
湍潤埃雲之化則不時有和風生發之應若四維發埃
昏驟注之變則不時有飄蕩振標之復其眚北其病內
舍腰脊骨髓外在谿谷踣膝故曰歲水不及濕迺盛行長

氣反用其化迺速暑雨數至民病腹滿身重濡泄寒瘍流水腰股痛發癰膻股膝不便煩寃足痿清厥脚下痛甚則肘腫臧氣不政腎氣不衡復有大風暴發草偃木零生長不鮮面色時變筋骨辟辟肉潤癰目視眈眈肌肉胗發氣并膈中痛於心腹黃氣迺損其穀不登初之氣自庚申年大寒日己初至是歲春分日卯初凡六十日八十七刻半主位少角木客氣太陰土中見水運土勝水地氣遷陰始凝氣始肅水迺冰寒雨化其病中熱脹

面目浮腫善眠鼾衄嚏欠嘔小便黃赤甚則淋宜治太陰之客以甘補之以苦瀉之以甘緩之歲食白穀間穀用麻雖有濕邪不能為害二之氣自春分日卯正至小滿日丑正凡六十日有奇主位太徵火客氣少陽火中見水運陽迺布民迺舒物迺生榮厲大至民善暴死水運承之其邪亦微宜治少陽之客以鹹補之以甘瀉之以鹹熯之歲食白穀間穀宜豆雖有火邪莫之能害三之氣自小滿日寅初至大暑日子初凡六十日有奇主

位太徵火客氣陽明金中見水運天政布涼迺行燥熱
交合燥極而澤民病寒熱宜治陽明之客以酸補之以
辛瀉之以苦泄之歲食白穀間穀用黍雖有燥邪莫之
能害四之氣自大暑日子正至秋分日戌正凡六十日
有奇主位少宮土客氣太陽水中見水運氣與運同是
謂司氣寒雨降民病暴仆振慄譖妄少氣噎乾引飲及為
心痛癰腫瘡寒瘡瘍之疾骨痠血便宜治太陽之客以
苦補之以酸瀉之以苦堅之以辛潤之歲食丹穀間穀

用稷雖有寒邪莫之能害是氣也用寒遠寒無犯司氣之寒五之氣自秋分日亥初至小寒日酉初凡六十日有奇主位太商金客氣厥陰木中見水運水生木春令反行草迺生榮民氣和宜調厥陰之客以辛補之以酸瀉之以甘緩之歲食丹穀間穀用稻雖有風邪莫之能害終之氣自小雪日酉正至大寒日未正凡六十日有奇主位少羽水客氣少陰火中見水運水得位運水居之陽氣布候反溫蟄蟲來見流水不冰民迺康平其病

溫宜治少陰之客以醎補之以甘瀉之以酸收之歲穀宜
丹間穀宜豆雖有熱邪莫之能害此六氣之化也歲氣
之交天氣勝者少陽復之地氣勝者太陽復之詳察陰
陽所在而調之以正為期

壬戌歲圖



太陽寒水司天太陰濕土在泉中見太角木運歲木太
過氣化運行先天太陽為天氣左厥陰右陽明故天政
所布其氣肅太陰為地氣左少陽右少陰故地氣靜而其令徐
寒臨太虛其政大舉則火發待時少陽中治時雨迺涯
雲朝北極濕化迺布澤流萬物寒化六風化八雨化五
正化度也鱗蟲靜保蟲育歲物之宜也鱗蟲不成燥毒
不生地氣制之也寒敷於上雷動於下寒濕之氣持於
氣交民病寒濕發肌肉萎足痿不收濡瀉血溢是歲水

為天氣土為地氣土勝水當資化源以助天氣又歲遇木運木能制土地氣迺鬱其邪亦微必折鬱土抑其運木扶其不勝無使暴過而生其疾食玄齡之穀以全其真避虛邪之氣以安其正運與寒濕異以燥濕化其化上苦溫中酸和下甘溫藥食宜也歲半之前太陽主之寒淫所勝則寒氣迺至水且冰血變於中發為癰瘍民病厥心痛飢飢善悲時眩仆病本於心診在神門之脉其法平以辛熱佐以甘苦以鹹補之歲半之後太陰主

之濕淫於內則埃昏巖谷黃反見黑至陰之交民病飲
積心痛耳聾渾渾淳淳噎腫喉痺少腹痛腫病衝頭痛
目項腰髀胸膈皆痛其法宜治以苦熱佐以酸淡以苦
燥之以淡泄之氣交之間木運太過命曰發生之紀是
謂啓陳土疎泄蒼氣達陽和布化陰氣迺隨生氣淳化
萬物以榮其化生其氣美其政散其令條舒其動掉眩
巔疾其德鳴靡啟折其象春其變振慄摧拔其穀麻稻
其果李桃其畜鷄犬其蟲毛介其物中堅外堅其色青

黃白其味酸甘辛其經足厥陰少陽其藏肝脾其病怒
故曰歲木太過風氣流行脾土受邪民病飧泄食減體
重煩冤腸鳴腹支滿甚則忽忽善怒眩冒顛疾脇痛診
在衝陽之脉其法治以酸和初之氣自辛未年大寒日
申初至是歲春分日午初凡六十日八十七刻半主位
太角木客氣少陽火中見木運歲木當其位相火居之
地氣遷氣迺大溫草迺早榮民迺厲溫病迺作身熱頭痛嘔
吐肌腠瘡瘍宜治少陽之客以醎補之以甘瀉之以醎

庚之歲穀宜玄間穀宜豆雖有火邪不能為害二之氣
自春分日午正至小滿日辰正凡六十日有奇主位少
徵火客氣陽明金中見木運金勝木大涼迺至草迺遇
寒火氣遂抑民病氣鬱中滿寒迺始宜治陽明之客
以酸補之以辛瀉之以苦泄之歲穀宜玄間穀宜黍雖
有燥邪不能為害三之氣自小滿日巳初至大暑日卯
初凡六十日有奇主位少徵火客氣太陽水中見木運
天政布寒氣行雨迺降民病寒熱中癰疽注下心熱瞽矇

宜治太陽之客以苦補之以鹹瀉之以苦堅之以辛潤
之歲穀宜稷間穀宜豆雖有寒邪不能為害四之氣自
大暑日卯正至秋分日丑正凡六十日有奇主位太宮
土客氣厥陰木中見木運氣與運同是謂司氣風濕交
爭風化為雨迺長迺化迺成民病太熱少氣肌肉萎注
下赤白宜治厥陰之客以辛補之以酸瀉之以甘緩之
歲穀宜穀間穀宜稻雖有風邪不能為害是氣也用溫
遠溫無犯司氣之溫五之氣自秋分日寅初至小雪日

子初凡六十日有奇主位少商金客氣少陽火中見木運木生火火勝金陽復化草迺長迺化迺成民迺舒宜調少陰之客以鹹補之以甘瀉之以酸收之歲穀宜藎間穀宜豆雖有熱邪不能為害終之氣自小雪日子正至大寒日戌正凡六十日有奇主位太羽水客氣太陰土中見木運地氣正濕令行陰凝太虛寒風以至宜治太陰之客以甘補之以苦瀉之以甘緩之歲穀宜藎間穀宜麻雖有濕邪不能為害此六氣之化也歲氣之交天氣勝則太陰之復地氣勝則厥陰之復法治之所謂濕者燥之溫者清之故其氣迺平也

癸亥歲圖



厥陰風木司天少陽相火在泉中見少徵火運歲火不及氣化運行後天不及而同地化是謂同歲會氣之平也諸同正歲氣化運行同天平火之歲命曰升明之紀正陽而治德施周普五化鈞衡其氣高其性速其用燔灼其化蕃茂其政明曜其候炎暑其令熱其類火其應夏其穀麥其果杏其實絡其蟲羽其畜馬其色變其味苦其物脉其音徵其數七其在人也其藏心其主舌其養血其病瞋癰此歲運之化也天地之氣上見厥陰左

少陰右太陽故天氣擾而其政撓下見少陽左陽明右太陰故地氣正而其令速風生高遠炎熱從之雲趨雨府濕化迺行風火同德上應歲星熒惑其穀蒼丹間穀言太宮太羽者其耗文角品羽寒化雨化勝復同邪氣化度也風化八火化二正化度也歲物之宜則毛蟲靜羽蟲育地氣所制則介蟲耗寒毒不生風燥火熱勝復更作蟄蟲來見流水不冰熱病行於上風燥勝復行於中是歲陰為天氣陽為地氣歲火運適平不資化源惟

贊其運火無使邪勝歲宜以辛調上鹹調下畏火之氣
無妄犯之其化上辛涼中鹹和下鹹寒藥食宜也歲半
之前厥陰主之多風化者厥陰之政也歲半之後少陽
主之多火化者少陰之令也初之氣自壬戌年大寒日
亥初至是歲春分日酉初凡六十日八十七刻半主位
太徵木客氣陽明金中見火運寒始肅殺氣方至民病
寒於右之下運行平火其邪迺微宜調陽明之客以酸
補之以辛瀉之以苦泄之歲穀宜蒼間穀宜黍二之氣

自春分日酉正至小滿日未正凡六十日有奇主位少
徵火客氣太陽水中見火運火居其位寒水承之寒不
去華雪水冰殺氣施行霜迺降名草上焦寒雨數至陽復
化民病熱於中宜調太陽之客以苦補之以鹹瀉之以
苦堅之以辛潤之歲穀宜蒼間穀宜稷三之氣自小滿
日申初至大暑日午初凡六十日有奇主位少徵火客
氣厥陰木中見火運火當其位風木客之天政布風迺
時舉民病泣出耳鳴掉眩宜調厥陰之客以辛補之以

酸瀉之以甘緩之歲穀宜蒼間穀宜稷四之氣自大暑
日午正至秋分日辰正凡六十日有奇主位少宮土客
氣少陰火中見火運氣與運同灼化所居溽暑濕熱相
薄爭於左之上民病黃痺而為肘腫宜調少陰之客以
鹹補之以苦瀉之以酸收之歲穀宜丹間穀宜豆五之
氣自秋分日巳初至小雪日卯初凡六十日有奇主位
少商金客氣太陰土中見火運氣火生土燥濕更勝沉陰迺
布寒氣及體風雨迺行宜調太陰之客以甘補之以苦

瀉之以甘緩之歲穀宜丹間穀宜麻終之氣自小雪日
卯正至大寒日丑正凡六十日有奇主位太羽水客氣
少陽火中見火運氣符會畏火司令陽迺大化熱蟲出見流
水不冰地氣大發草迺舒其病溫厲宜調少陽之客以鹹補
之以甘瀉之以鹹熯之歲穀宜丹間穀宜豆是氣也用
熱遠熱無犯司氣之熱歲氣之化其氣專其化淳又遇
火氣平與歲會同是謂行令邪氣乘之其病持久經曰
中行令者其病徐而持也

右六氣司歲五運統歲六五相合三十年一周六十
年再周凡千四百四十氣而天地之氣數備焉終而
復始時立氣布如環無端守其數稽其化若合符節
可謂悉矣此持定期之紀氣化之常也不能無變變
不可以常拘故推其要或標本不同謂太陽為寒陽
明為燥少陽為炎太陰為濕少陰為熱厥陰為風所
謂本也本之下為中之見見之下為氣之標太陽之
中見少陰時或為暄太陰之中見陽明時或為燥以

至燥濕相交暄寒相應風火相值其本標不同有如此者或因積數之差若春溫夏暑秋涼冬寒時令之常也或春夏秋冬各差其分應在四維後皆三度有奇積數之差有如此者或因有勝有復謂六氣之化行各有次止各有位隨六節以觀其應或至而太過者六氣之勝也若有非常之氣應在歲半之前者名為歲氣淫勝應在歲半之後者名為六氣來復其勝復有如此者或因氣位相勝謂天有常政地有常令

應各有時當其時各以其化來報至而甚者客勝也
若臨在反勝者則司歲之氣不得其應是謂主勝其
氣位相勝有如此者或因氣運之鬱謂氣運各有所
制屈而不伸也天氣勝運則運化鬱運勝在泉則地
氣鬱或六氣臨勝己之位則六氣亦鬱凡有所鬱則
進退升降皆不能也其氣鬱有如此者或因鬱而必
發謂五氣之鬱乘時而發也木發則標驟其應無時
火發則暵昧應在四氣土發則昏憤應在夏金發而

毀折應在秋水發而電雪應在二火前後其鬱氣之
發有如此者或因邪氣反勝謂天政布於夏地令行
於冬至其時或當寒而熱當熱而寒當溫而清當燥
而熱當濕而燥反勝有如此者夫定期之外猶有是
者則不拘於常數也茲造化密多所以新新不窮歟

普濟方卷十二

欽定四庫全書

子部
普濟方卷十三

詳校官太醫院恩糧臣袁天錫

編修臣倉聖脈覆勘

總校官原任中允臣王燕緒

校對官中書臣鮑之鍾

謄錄監生臣范廷驊

欽定四庫全書

普濟方卷十三

明

周王朱橚撰

臟腑總論

五臟六腑經絡論

肺手太陰之脉起於中焦下絡大腸還循胃口上膈屬肺從肺系橫出腋下游膈內行少陰心主之前下肘中循臂內上骨下廉入寸口上魚循魚際出大指之端其支者從腕後直出次指內廉出其端是動則病肺脹滿膨

膨而喘欬缺盆中痛甚則交兩手而脅此為臂厥是主
肺所生病者欬嗽上氣喘喝煩心胃滿臍臂內前廉痛
掌中熱氣盛有餘則肩臂痛風寒汗出中風小便數而
欠氣虛則肩臂痛寒少氣不足以息溺色變為此諸病盛
則瀉之虛則補之熱則疾之寒則留之陷下則灸之不
盛不虛以經取之盛者寸口大三倍於人迎虛者則寸
口反小於人迎也○大腸手陽明之脉起於大指次指
之端循指上廉出合谷兩骨之間上入兩筋之中循臂

上廉入肘外廉循臑外前廉上肩出髃骨之前廉上出於柱骨之會上入缺盆絡肺下膈屬大腸其支者從缺盆上頸貫頰下入齒縫中還出挾口交人中左之右右之左上挾鼻孔是動則病齒痛頰腫是主津液所生病者目黃口乾𦵏𦵏喉痺肩前臑𦵏痛大指次指痛不用氣有餘則當脉所過者熱腫虛則寒慄然不復為此諸病盛則瀉之虛則補之熱則疾之寒則留之陷下灸之不盛不虛以經取之盛者人迎大三倍於寸口虛者人

迎反小於寸口也○胃足陽明之脉起於鼻之交頰中

旁納

一本作約字

太陽之脉下循鼻外上入齒中還出挾口

環唇下交承漿却循頤後下廉出大迎循頰車上耳前
過客主人循髮際至額顙其支者從大迎前下人迎循喉
嚨入缺盆下膈屬胃絡脾其直者從缺盆下乳內廉下
挾臍入氣衝中其支者起於胃口下循腹裏下至氣衝
中而合以下髀關抵伏兔下膝臑中下循脛外廉下足
跗入中指內間其支者下廉三寸而別下入中指外間

其支者別跗上入大指間出其端是動則病悽悽振寒
善呻數欠顏黑病至則惡人與火聞木聲則惕然而驚
心欲動獨閉戶塞牖而處甚則欲上高而歌棄衣而走
責響腹脹是為骭厥是主血所生病者狂瘡溫淫汗出
𩑦衄口喎唇胗頸腫喉痺大腹水腫膝臘腫痛循膺乳
氣衝股伏兔骭外廉足跗上皆痛中指不用氣盛則身
以前皆熱其有餘於胃則消穀善飢溺色黃氣不足則
身以前皆寒慄胃中寒則脹滿為此諸病盛則瀉之虛

則補之熱則疾之寒則留之陷下則灸之不盛不虛以
經取之盛者人迎大三倍於寸口虛者人迎反小於寸
口也○脾足太陰之脉起於大指之端循指內側白肉
際過核骨後上內踝前廉上踰內循脛骨後交出厥陰
之前上膝股內前廉入腹屬脾絡胃上行挾咽連舌本
散舌下其支者復從胃別上膈注心中是動則病舌本
強食則嘔胃脘痛腹脹善噫得後與氣則快然如衰身
體皆重是主脾所生病者舌本痛體不能動搖食不下

煩心心下急痛溏瘕泄水閉黃疸不能卧強立股膝內腫厥足大指不用為此諸病盛則瀉之虛則補之熱則疾之寒則留之陷下則灸之不盛不虛以經取之盛者寸口大三倍於人迎虛者寸口反小於人迎也○心手少陰之脉起於心中出屬心系下膈絡小腸其支者從心系上挾咽繫目系其直者復從心系却上肺下出腋腋下循臑內後廉行手太陰心主之後下肘內循臂內後廉抵掌後銳骨之端入掌內後廉循小指之內出其端是

動則病噎乾心痛渴而欲飲是為臂厥是主心所生病者目黃脇痛臍臂內後廉痛厥掌中熱為此諸病盛則瀉之虛則補之熱則疾之寒則留之陷下則灸之不盛不虛以經取之盛者寸口大三倍於人迎虛者寸口反小於人迎也○小腸手太陽之脉起於小指之端循手外側上腕出踝中直上循臂骨下廉出肘內則兩筋之間上循臍外後廉出肩解繞肩胛交肩上入缺盆絡心循咽下膈抵胃屬小腸其支者從缺盆循頸上頰至目

銳眚却入耳中其支者別頰上頤抵鼻至目內眥斜絡
於顴是動則病噎痛頷腫不可回顧肩似拔臑似折是
主液所生病者耳聾目黃頰頷腫痛肩臑肘臂外後廉
痛為此諸病盛則瀉之虛則補之熱則疾之寒則留之
陷下則灸之不盛不虛以經取之盛者人迎大再倍於
寸口虛者人迎反小於寸口也○膀胱足太陽之脉起
於目內眥上額交顛其支者從顛至耳上角其直者從
顛入絡腦還出別下項循肩髃內挾脊抵腰中入循髀

絡腎屬膀胱其支者從腰中下挾脊貫臀入膕中其支者從髀內左右別下貫腓挾脊內過髀樞循腓外從後廉下合膕中以下貫踠內出外踝之後循京骨至小指外側端是動則病衝頭痛目似脫項如拔脊痛腰似折髀不可以曲膕如結膕如裂是為踝厥是主筋所生病者痔瘡狂癲疾頭顫項痛目黃淚出衄血項背腰尻膕腓脚皆痛小指不用為此諸病盛則瀉之虛則補之熱則疾之寒則留之陷下則灸之不盛不虛以經取之

盛者人迎大再倍於寸口虛者人迎反小於寸口也○
腎足少陰之脉起於小指之下邪趨足心出於然谷之
下循內踝之後別入跟中以上腠內出臍內廉上股內
後廉貫脊屬腎絡膀胱其直者從腎上貫肝膈入肺中
循喉嚨挾舌本其支者從肺出絡心注胃中是動則病
飢不飲食面如漆柴欬唾則有血喝喝而喘坐而欲起
目眈眈如無所見心如懸若飢狀氣不足則善恐心惕
惕如人將捕之是為骨厥是主腎所生病者口熱舌乾咽

腫上氣噎乾及痛煩心心痛黃疸腸澼脊股內後廉痛
痿厥嗜卧足下熱而痛為此諸病盛則瀉之虛則補之
熱則疾之寒則留之陷下則灸之不盛不虛以經取之
灸則強食生肉緩帶被髮大杖重履而步盛者寸口大
再倍於人迎虛者寸口反小於人迎也○心主手厥陰
心包絡之脉起於胸中出屬心包絡下膈歷絡三焦其支
者循胃中出脇下腋三寸上抵腋下循臍內行太陰少陰
之間入肘中下臂行兩筋之間入掌中循中指出其端

其支者別掌中循小指次指出其端是動則病手心熱
臂肘攣急腋腫甚則胃脇支滿心中憺憺大動面赤目
黃喜笑不休是主脉所生病者煩心心痛掌中熱為此
諸病盛則瀉之虛則補之熱則疾之寒則留之陷下則
灸之不盛不虛以經取之盛者寸口大一倍於人迎虛
者寸口反小於人迎也○三焦手少陽之脉起於小指
次指之端上出次指之間循手表腕出臂外兩骨之間
上貫肘循臑外上肩而交出足少陽之後入缺盆布臄

中散絡心包下膈循屬三焦其支者從臚中上出缺盆
上項繫耳後直上出耳上角以屈下頰至頰其支者從
耳後入耳中出走耳前過客主人前交頰至目銳眥是
動則病耳聾渾渾燁燁噎腫喉痺是主氣所生病汗出
目銳眥痛頰腫耳後肩臑肘臂外皆痛小指次指不用為此諸
病盛則瀉之虛則補之熱則疾之寒則留之陷下則灸
之不盛不虛以經取之盛者人迎大一倍於寸口虛者
人迎反小於寸口也○膽足少陽之脉起於目銳眥上

抵頭角下耳後循頸行手少陽之前至肩上却交出手
少陽之後入缺盆其支者從耳後入耳中出走耳前至
目銳眥後其支者別銳眥下大迎合於手少陽抵於頤
下加頰車下頸合缺盆以下胃中貫膈絡肝屬膽循脇
裏出氣衝繞毛際橫入髀厭中其直者從缺盆下腋循
胃過季脇下合髀厭中以下循髀陽出膝外廉下外輔
骨之前直下抵絕骨端下出外踝之前循足跗上入小
指次指之間其支者別跗上入大指之間循大指歧骨

內出其端還指爪甲出三毛是動則病口苦善太息心
脇痛不能轉側而微有塵體無膏澤足外反熱是為陽
厥是主膽所生病者頭痛額痛目銳皆痛缺盆中腫痛
腋腫馬刀俠癭汗出振寒瘡胃脇肋髀膝外至脛絕
骨外踝前反諸節皆痛小指次指不用為此諸病盛則
瀉之虛則補之熱則疾之寒則留之陷下則灸之不盛
不虛以經取之盛者人迎大一倍於寸口虛者人迎反
小於寸口也○肝足厥陰之脈起於大指聚毛之際上

循足跗上廉去內踝一寸上踝八寸交出太陰之後上
臍內廉循股陰入毛中過陰器抵小腹挾胃屬肝絡膽
上貫膈布脇肋循喉嚨之後上入頤頰連目系上出額
與督脈會於巔其支者從目系下頰裏環唇內其支者
復從肝別貫膈上注肺是動則腰痛不可以俛仰丈夫
癰疝婦人少腹腫甚則噤乾面塵脫色是主肝所生病
者胃滿嘔逆飧泄狐疝遺溺癰閉為此諸病盛則瀉之
虛則補之熱則疾之寒則留之陷下則灸之不盛不虛

以經取之盛者寸口大一倍於人迎虛者寸口反小於人迎也○手太陰之別名曰列缺起於腕上分間並太陰之經直入掌中散入魚際其病實則手銳掌熱虛則欠缺少便遺數取之去腕半寸別走陽明也○手少陰之別名曰通里去腕一寸半別而上行循經入於心中繫舌本屬目系其實則支膈虛則不能言取之掌後一寸別走太陽也○手心主手厥陰之別名曰內關去腕二寸出於兩筋之間循經以上繫於心包絡心系實則心

痛虛則為頭強取之兩筋間也○手太陽之別名曰支正
上腕五寸內注少陰其別者上走肘絡肩髃實則節弛
肘廢虛則生疣小者如指痂疥取之所別也○手陽明
之別名曰偏歷去腕三寸別入太陰其別者上循臂乘
肩髃上曲頰偏齒其別者入耳合於宗脈實則齟齬虛
則齒寒痺隔取之所別也○手少陽之別名曰外關去
腕二寸外透臂注胷中合心主病實則肘攣虛則不收
取之所別也○足太陽之別名曰飛揚去踝七寸別走

少陰實則欬窒頭背痛虛則欬衄取之所別也○足少陽之別名曰光明去踝五寸別走厥陰下絡足跗實則厥虛則痿躄坐不能起取之所別也○足陽明之別名曰豐隆去踝八寸別走太陰其別者循脛骨外廉上絡頭項合諸經之氣下絡喉嗑其病氣逆則喉痺卒瘕實則狂癲虛則足不收脛枯取之所別也○足太陽之別名曰公孫去本節之後一寸別走陽明其別者入絡腸胃厥氣上逆則霍亂實則腸中切痛虛則鼓脹取之

所別也。○足少陰之別名曰大鍾。當踝後繞跟別走太陽。其別者并經上走於心包下外貫腰脊。其病氣逆則煩悶實則閉癰。虛則腰痛。取之所別也。○足厥陰之別名曰蠡溝。去內踝五寸。別走少陽。其別者循脛上臑結於莖。其病氣逆則臑腫卒疝。實則挺長。虛則暴癢。取之所別也。○任脈之別名曰尾翳。下鳩尾散于腹。實則腹皮痛。虛則癢搔取之所別也。○督脈之別名曰長強。挾脊上項散頭上下當肩胛左右。別走太陽。入貫脊實則

脊強虛則頭重高搖之挾脊之有過者取之所別也○
脾之大絡名曰大包出淵腋下三寸布胃脇實則身盡
痛虛則百節盡皆縱此脈若羅絡之血者皆取之脾之
大絡脈也凡此十五絡者實則必見虛則必下視之不
見求之上下人經不同絡脈異所別也○足太陽之筋
起於足小指上結於踝邪上結於膝其下循足外側結
於踵上循跟結於臑其別者結于臑外上臑中內廉與
臑中并上結於臀上挾脊上項其支者別入結於舌本

其直者結於枕骨上頭下額結於鼻其支者為目上網
下結於頤其支者從腋後外廉結於肩髃其支者入腋
下上出缺盆上結於完骨其支者出缺盆邪上出於頤
其病小指支跟腫痛脰攣脊反折項筋急肩不舉腋
支缺盆中紐痛不可左右搖治在燭針劫刺以知為數
以痛為輸名曰仲春痺○足少陽之筋起於小指次指
上結外踝上循脛外廉結於膝外廉其支者別起外
輔骨上走髀前者結於伏兔之上後者結於尻其直者

上乘眇季脇上走腋前廉繫於膺乳結於缺盆直者上
出腋貫缺盆出太陽之前循耳後上額角交巔上下走
額上結於頰支者結於目眥為外維其病小指次指支
轉筋引膝外轉筋膝不可屈伸膈筋急前引髀後引尻
即上乘眇季脇痛上引缺盆膺乳頸維筋急從左之右
右目不開上過右角並蹠脈而行左絡於右故傷左角
右足不用命曰維筋相交治在燔針劫刺以知為數以
痛為輸名曰孟春痺也○足陽明之筋起於中三指結

於跗上邪外上加於輔骨上結於膝外廉直上結於髀
樞上循脇屬脊其直者上循骹結於缺盆其支結外
輔骨合少陽其直者上循伏兔上結於髀聚於陰器上
腹而布至缺盆而結上頸上挾口合於頰下結於鼻上
合於太陽太陽為目上網陽明為目下網其支者從頰
結於耳前其病足中指支脛轉筋脚跳堅伏兔轉筋髀
前腫癢疝腹筋急引缺盆及頰卒口僻急者目不合熱
則筋縱目不開頰筋者有寒則急引頰移口有熱則筋

弛縱緩不勝收故僻治之以馬膏其急者以白酒和桂以塗其緩者以桑鈎鈎之即以生桑炭置之坎中高下以坐等以膏熨急頗且飲美酒散美炙內不飲酒者自強也為之三拊而已治在燭針劫刺以知為數以痛為輸名曰季春痺也○足太陰之筋起於大指之端內側上結於內踝其直者絡於膝內輔骨上循陰股結於髀聚於陰器上腹結於臍循腹裏結于肋散于胃中其內者著於脊其病足大指支內踝痛轉筋痛膝內輔骨痛陰

股引髀而痛陰器紐痛下引臍兩脇痛引膺中脊內痛
治在燔針劫刺以知為數以痛為輸命曰孟秋痺也○
足少陰之筋起於小指之下並足太陰之筋邪走內踝
之下結於踵與太陽之筋合而上結於內輔之下並太
陰之筋而上循陰股結于陰器循脊內挾脊上至項結
於枕骨與足太陽之筋合其病足下轉筋及所過而結
者皆痛及轉筋病在此者主癰瘰及瘕在外者不能俛在內
者不能仰故陽病者腰反折不能俛陰病者不能仰治

在燭針劫刺以知為數以痛為輸在內者熨引飲藥此筋折紐紐發數甚者死不治名曰仲秋痺也○足厥陰之筋起於大指之上上結于內踝之前上循脛上結內輔之下上循陰股結于陰器絡諸筋其病足大指支內踝之前痛內輔痛陰股痛轉筋陰器不用傷於內則不起傷於寒則陰縮入傷於熱則縱挺不收治在行水清陰氣其病轉筋者治在燭針劫刺以知為數以痛為輸名曰季秋痺也○手太陽之筋起于小指之上結於腕上

循臂內廉結于肘內銳骨之後彈之應小指之上入結于腋下其支者後走腋後廉上繞肩胛循脰出走太陽之前結于耳後完骨其支者入耳中直者出耳上下結於額上屬目外眥其病小指支肘內銳骨後廉痛循臂陰入腋下痛腋後廉痛繞肩胛引頸而痛應耳中鳴痛引額目瞑良久乃得視頸筋急則為筋痿頸腫寒熱在頸者治在燔針劫刺之以知為數以痛為輸其為腫者後而銳之本支者上曲牙循耳前屬目外眥上額結

于角其病當所過者支轉筋治在燭針劫刺以知為數以痛為輸名曰仲夏痺也○手少陽之筋起于小指次指之端結於腕上循臂結于肘上繞臑外廉上肩走頸合手太陽其支者當曲頰入繫舌本其支者上曲牙循耳前屬目外眥上垂頰結于角其病當所過者即支轉筋舌卷治在燭針劫刺以知為數以痛為輸名曰季夏痺也○手陽明之筋起于大指次指之端結于腕上循臂上結于肘外上臑結于髃其支者繞肩胛挾脊直者

從肩髃上頸其支者上頰結于頄直者上出手太陽之前上左角絡頭下右頤其病當所過者支痛及轉筋肩不舉頸不可左右視治在燭針劫刺以知為數以痛為輸名曰孟夏痺也○手太陽之筋起于大指之上循指上行結于魚後行寸口外側上循臂結肘中上臑內廉入腋下出缺盆結肩前髃上結缺盆下結胃裏散貫膈合膈下抵季脇其病當所過者支轉筋痛甚成息膈急吐血治在燭針劫刺以知為數以痛為輸名曰仲冬痺

也○手心主之筋起于中指與太陰之筋並行結于肘
內廉上臂陰結腋腋下散前後挾脇其支者入腋散胃
中結于臂其病當所過者支轉筋前及胃痛息責治在
燔針劫刺以知為數以痛為輸名曰孟冬痺也○手少
陰之筋起于小指之內側結于銑骨上結肘內廉上入
腋交太陰挾乳裏結于胃中循臂下繫于臍其病內急
心承伏梁下為肘網其病當所過者支轉筋筋痛治在
燔針劫刺以知為數以痛為輸其成伏梁唾血膿者死

不治經筋之病寒則反折筋急熱則筋弛縱不收陰痿
不用陽急則反折陰急則俛不伸焮刺者刺寒急也熱
則筋縱不收無用燔針名曰季冬痺也○足之陽手之
太陽筋急則口目為僻皆急不能卒視治皆如右方也

五臟所主論

夫在天之風在地為木在人為肝惟肝則主風在天之熱

暄暑

熾煥熱
之用也

在地為火在人為心惟心則主熱在天之濕在

地為土在人為脾惟脾則主濕在天之燥在地為金在

人為肺惟肺則主燥在天之寒在地為水在人為腎惟
腎則主寒此天地自然之氣也氣之慙伏乘虛入人而
人不能克百病之所由生故風喜傷肝熱喜傷心濕喜

傷脾燥喜傷肺寒喜傷腎而暑喜傷心包絡

心包絡曰
膻中在胃

膈間蓋心主暑故暑氣
伏於三焦脾胃之間

其或風暑之勝木邪乘土則脾

病生焉熱氣之勝火邪乘金則肺病生焉濕氣之勝土

邪乘水則腎病生焉燥氣之勝金邪乘木則肝病生焉

寒氣大來心火亦為腎水所乘矣在關為人迎可以知

風寒暑濕熱燥所從入之門右關為氣口可以別臟氣
鬱暢與食氣聚散盈虛之候若乃憂愁思慮易耗心神
恚怒氣逆易損肝氣縱慾強志腎之戕形寒飲冷肺之
害飢飽勞倦脾之傷外之六氣相乘內之七情相感凡
是數者皆為五臟之邪因其所主而尋其各臟所受之
處則得之矣心主乎血所藏者神上應舌外應諸掌其
聲言其色赤其臭焦其味苦其液汗肝主筋所藏者魂
上應眼外應爪甲其聲呼其色青其臭臊其味酸其液

泣腎主骨所藏者精與志上應耳外應腰背其聲呻其

色黑其臭腐其味鹹其液唾

腎冷多唾
腎熱多渴

肺主氣所藏者

魄上應鼻外應皮毛其聲笑其色白其臭腥其味辛其

液涕脾主肌肉所藏者意與智上應口外應四肢其聲

歌其色黃其臭香其味甘其液涎故心肺在上主脈氣

也肝腎在下藏精血也脾居中州又所以主精血脈氣

之養也心之平脈浮大而散肝之平脈弦細而長腎之

平脈沉濡而滑肺之平脈短濇而浮脾之平脈和緩而

大平者五臟本然之正脉也春弦夏鉤

叔和云夏洪取大脉來盛之義

秋毛冬石以其四時當旺者象之木火金水四時各旺

七十有二日土為季脈每季之月寄旺一十八日春則

弦緩夏則洪緩秋則微緩冬則沉緩合四季而論則亦

七十有二矣春弦者端直之狀細弱而長是也夏鉤者

浮大而散來疾去遲是也秋毛者稀軟之狀輕虛似浮

是也冬石者沉濡而滑舉指來疾是也土之脈溫厚氣

行乎臟腑之中平和不可得見其衰則現焉所謂弦鉤

毛石蓋應時而略見耳其中須有穀神胃氣之和若弦如張弓弦鈎如操帶鈎毛如風吹毛石來如奪索去如彈石此皆危脈也此絕無胃氣也虧絕其能久乎若夫春得金脉夏得水脉秋得火脉冬得土脉四季得木脉其與心之脉尅肺肺之脉尅肝肝之脉尅脾脾之脉尅腎此皆賊邪也一藏無氣況可以為人乎然則諸腑之脉可得聞歟曰小腸微洪大腸微濡膀胱微沉胃微緩而膽微弦急此無他腑與臟合氣同氣相求斯有得其近

似者矣抑古人所為九臟者又何如耶曰形臟四一者
頭角二者耳目三者口齒四者胃中神臟五在心藏神在肝
藏魂在腎藏志肺藏魄而脾藏意然臟者神之舍色者
神之旗五臟已散其色必夭槁怪異常夭必亡矣抑猶
有說焉微遲濡弱其候雖不同而為寒為虛一也數實
長洪其形雖不類而為熱為實一也諸脈皆弦吾知其
病出於肝諸脈皆緩吾知其病出於脾諸脈皆濡吾知
其病出於肺脈皆浮洪病不在心乎脈皆沉滑病不在

腎乎若合臟腑而觀假如數在左寸數之主熱也沉之而得則熱入於心浮之而得則熱入於小腸遲在左尺遲主寒也沉之而得則寒入於腎浮之而得則寒入膀胱其餘以此推之

五臟病證虛實論

五臟各有所主至其病證莫不隨所主而見焉面赤喜笑舌破口乾頤燥掌熱心痛而腕脰上有動氣者心家病也面青多怒脇下痛硬欬逆目眩支節攣急轉筋澁

難臍左有動氣者肝家病也

肝乘脾挾水氣故欬逆足厥陰下絡於陰器故溲難

面黑而恐呵欠呻吟齒痛骨痿耳鳴精泄足脛寒腰脊痛小腹急疼瘕泄而裏急後重臍下有動氣者腎家病也面白善噫憂愁欲哭喘嗽氣逆咽喉不利洒淅惡寒熱臍左有動氣者肺家病也面黃善思善噫善嗜中脘脹滿飲食不消身體腫重肢節酸疼怠惰嗜卧四肢不收當臍動氣脾家病也東萊先生有曰肝受病則目不能視腎受病則耳不能聽脾受病口不能食心受病則

舌不能舉五臟病證以此觀之不待智者而後知矣然
而心之惡熱者何熱則潰濁也肝之惡風者何風則筋
燥急也腎何以惡燥燥則精涸竭肺何以惡寒寒則氣
留滯也脾何以惡濕濕傷肌肉肉傷則痿腫也五臟之
病推原及本安有不從所受中來哉是以臟氣有餘謂
之實臟氣不足謂之虛心實之候口乾喜笑身熱汗血
痛滿乎脾脇膺背之間肝實之候目赤多怒頭眩耳聾
痛引乎兩脇小腹之間腎實之候腹膨體腫少氣不言

骨痛殄泄而小便黃肺實之候喘促咳嗽上氣鼻張脛
股肩疼而胃中滿脾氣已實必至肢體重着而不舉腹
脹尿閼而苦飢故曰臟氣有餘謂之實者此也心虛則
恍惚多驚憂煩少色咳唾舌強腰背酸疼肝虛則眼目
昏胃痛筋脇拘攣恐懼面青如人將捕腎虛則心懸如
渴飢胃痛引脊厥逆洩變腹冷耳鳴肺虛則呼吸少氣
鼻涕噎乾肺中聲鳴喘乏咳血

唾中有紅縷者此肺損
為氣所傷也若脇下痛

而唾鮮血者此
熱氣傷肝也

其或吐逆泄利飲食不消腹脹腸鳴四

肢無力則脾虛之證生焉故曰臟氣不足謂之虛者此也大抵實者瀉之虛者補之無過不及以平為期否則實實虛虛損不足而益有餘至若心病而直視面鰲肝病而舌卷囊縮腎病而腰折骨枯肺病而毛焦氣出脾病而臍突唇反此則五臟之氣絕矣邪氣盛則實精氣奪則虛脉盛皮熱腹脹前後不通曰五實脉細皮寒氣少前後泄利飲食不進曰五虛諸病出者為虛諸病入者為實

陰出乘陽
陽入乘陰

言者為虛不言者為實緩者為虛急者

為實

陰主靜則緩
陽主急則急

濡者為虛堅者為實癢者為虛痛者

為實外痛內快者外實內虛外快內痛者外虛內實其
有心腹皮膚內外俱痛則按之而止者虛也按之而痛
者實也經所謂皮虛則熱脉虛則驚肉虛則重筋虛則
急骨虛則痛髓虛則墮腸虛則澹泄三陽實三陰虛汗
不出三陰實三陽虛汗不止與夫脉浮而緩自汗惡風法
當解肌脉浮而緊無汗惡寒法當發汗此表之病一虛
一實脉伏而牢腹痛秘結法當下之脉沉而弱厥冷自

利法當溫之此裏之病一實一虛內實之證心下牢強
腸中痛滿前後不通乾嘔而無物出者死內虛之證厥
逆煩燥而吐利不止者亡

五臟平脈

黎居士簡易方論云肝平脈來厭厭聶聶如循榆莢○
心平脈來累累如環如循琅玕○脾平脈來而和柔去
如鷄踐地○肺平脈來如藹藹如車蓋按之益大○腎
平脈來上大下銳濡滑如雀之喙

五臟病脉

肝病脉來實而益滑如循長竿○心病脉來累累連屬
其中微曲○脾病脉來實滿稍數如鷄舉足○肺病脉
來不上不下如循鷄羽○腎病脉來如引葛按之而益
堅

五臟死脈

肝死脈來急而益勁如新張弓弦○心死脈來前曲而
後居如操帶鉤○脾死脈來銳堅如鳥喙如屋之漏○

肺死脉來按之消索如風吹毛○腎死脉來之如解索去之如彈石

五臟真脉

真肝脉至中外急如循刀刃青黃然如按琴瑟弦色青白不澤毛折乃死○真心脉至堅而急如循薏苡子累累然色赤黑不澤毛折乃死○真脾脉至弱而乍數乍疎色黃青不澤毛折乃死○真肺脉至大而虛如以毛羽中人膚色赤白不澤毛折乃死○真腎脉至搏而絕

如指彈石辟辟然色黑黃不澤毛折乃死

五臟色候

氣所以養形而化神也周流乎五臟六腑之間發越乎五嶽四瀆之表神者氣之主氣者色之源色者容之表氣充乎內色形於外故色有青黃赤白黑以應肝心脾肺腎也夫五色得其正而形不相克者為善黃色尤為之正然亦不可無神氣要之得如秋雲襯月春蠶吐絲濕潤明快為佳設或枯燥暗惡則病將至矣內經所載

五臟之色生死各不同也○東方青色入通於肝肝象木而色青青欲如蒼璧之澤不欲如藍故云如翠羽者生如草滋者死○南方赤色入通於心心法火而色赤赤欲如帛裹朱不欲如赭故云如鷄冠者生如血𩚑者死○中央黃色入通於脾脾屬土而色黃黃欲如羅裏雄黃不欲如黃土故云如蟹腹中生如枳實者死○西方白色入通於肺肺徵金其色白白欲如鵝羽不欲如鹽故云如猪膏者生如枯骨者死○北方黑色入通於腎腎應

水而色黑黑欲重漆色不欲如地蒼故云如鳥羽者生如炭煤者死

五臟聲音

詩云情動於中而形於言故人之有言將有所為則意與氣合而聲隨至矣聲之所發會於五臟而備五音矣○肝其音角其聲呼在志為怒在變動為握○心其音徵其聲言在志為笑在變動為擾○脾其音宮其聲歌在志為思在變動為噦○肺其音商其聲哭在志為慮在

變動為欬○腎其音羽其聲呻在志為恐在變動為慄

五臟臭味

臭陽也其氣上達故心主之味陰也物成致養焉故脾主之五行互相連故五臟各復自有臭味亦各從五行之數也故內經曰形不足者補之以氣精不足者補之以味五臟各有補之法詳列如左○肝其臭臊其味酸穀以麥為養果以李為助菜以葵為充肉以犬為益藥以空青為治合而服之以補精益氣○心其臭焦其味苦

穀以小豆為養果以梨為助菜以薤為充肉以羊為益
藥以丹砂為治合而服之以補精益氣○脾其臭香其
味甘穀以大豆為養果以棗為助菜以韭為充肉以牛
為益藥以雄黃為治合而服之以補精益氣○肺其臭
腥其味辛穀以麻為養果以桃為助菜以葱為充肉以
雞為益藥以雲母為治合而服之以補精益氣○腎其臭
腐其味鹹穀以黃黍為養果以栗為助菜以藿為充肉
以豕為益藥以磁石為治合而服之以補精益氣

五臟主配

肝者罷極之本魂之居也其華在爪爪者筋之餘其充在筋筋者肝之養開竅於目目者肝之官與膽為合膽者肝之府肝主內血配於仁為陽中之少陽通於春氣○心者生之本神之變也其華在面心火氣騰上使五色修明而榮於其面也其充在血脉血脉者心之養開竅於舌舌用非竅寄通於耳耳為心之官與小腸合小腸者心之府心主行血配於禮為陽中之太陽通於夏

氣○脾者倉廩之本營之居也其華在唇四白肉際唇者脾之外候也其充在肌肌者脾之所至開竅於口口者脾之官與胃為合胃者脾之府脾主裏血配於信上合太陰通於土氣○肺者氣之本魄之處也其華在毛其充在皮皮毛者肺之所養開竅於鼻鼻者肺之官與大腸為合大腸者肺之府肺主持諸氣配於義為陰中之太陰通於秋氣○腎者主蟄封藏之本精之處也其華在髮髮者血之餘腦之所養腎主於髓而腦為髓海

其充在骨骨者腎之外應開竅於二陰二陰者前後便也
前後便者腎之外穴也與膀胱為合膀胱者腎之府主
受五臟六腑之精而藏配於智為陰中之少陰通於冬
氣

五邪相干

假令肝病

實邪風熱相合風性急火搖動焰而旋轉其脉弦而
緊洪風熱發狂宜羌活湯

羌活 川芎

大黃

各一兩

甘草

五錢

右咬咀每服五錢水二鍾煎至六分去滓溫服

虛邪風寒相合本慮腎恐拘急自汗其脉弦緊而沉
仲景云風感太陽移證在太陽經中桂枝加附子湯
主之○賊邪風燥相合血虛筋縮皮膚皴揭脉弦浮
而濡仲景云血虛筋急桂枝加栝蒌湯主之○微邪
風濕相合體重節痛藏府洞泄脉弦長而緩仲景云
身體疼痛下利清穀急當救裏四逆湯主之○正邪

中風目眩頭重叫怒不吐脉弦緊而長仲景云甚則
為癰為瘧真羗活湯本草云羗活主瘧主癰防風黃
耆為佐小兒為癰大人為瘧

假令心病

實邪熱濕相合憤憤心煩熱蒸不眠脾經絡於心心
經起於脾二經相接故為濕熱脉浮大而緩足太陰
寄證在手太陽宜梔豉湯若痞加厚朴枳實○虛邪
熱風相合妄聽妄聞耳簫聲膽與三焦之經同出於

耳銅人云刺關衝出血瀉支溝脉浮大而弦初小柴胡湯後大柴胡湯此證是太陽與少陽為病前客後主也○賊邪熱寒相合膽傷心懸如飢神怯恐怖足少陰與手厥陰相接水中心經手邪故神怯怖耳脉大而沉濡亦在太陽經中內經曰心虛則熱收於內黃連附子湯瀉心湯主之法云謂熱多寒少以為佐矣如寒多熱少加附子乾薑佐之○微邪熱燥相合過飲歌樂實為熱燥俗言暢飲也病人曰快活快活

是有聲於歌樂也以意思漿是無聲歌樂也脉洪大而瀉白虎湯主之喘則加人參○正邪熱也脫陽見鬼躁擾狂起脉洪實一呼四至是八至脉也小承氣湯主之謂復堅大也

假令脾病

實邪溫燥相合胃中燥屎腹滿堅痛其脉緩而長瀉是太陽陽明證也以承氣湯主之○虛邪濕熱相合熱陷胃中腸癖下血脉中緩大黃黃連解毒湯主之

○賊邪濕風相合嘔逆脇痛往來寒熱脉緩而弦長
小柴胡湯主之○微邪濕寒相合濕與寒交寒來求
濕身黃而不熱體重而不渴謂之寒濕其脉緩沉而
滑木附湯主之如小便不利者加茯苓○正邪濕自
病腹滿時痛手足自溫其脉沉濡而長虛痛桂枝加
芍藥湯主之實痛桂枝加大黃湯

假令肺病

實邪燥寒相合毛聳皮涼溲多而清其脉短濡而沉

此證如秋冬宜八味丸若春夏宜地黄丸○虛邪燥濕相合微喘而痞便難而痰其脉浮濇而緩枳實理中丸主之如喘甚加人參若便難加木香檳榔各五分為極細末煎下理中丸○賊邪燥熱相合鼻塞飢衄血溢血泄其脉濇而浮大甚者桃仁承氣湯微者犀角地黄湯極者抵當湯微極抵當丸○微邪燥風相合皮著甲枯血虛氣虛二藏俱虛先血後氣其脉浮濇而弦久養氣血主之○正邪燥自病其氣奔鬱

皆屬於肺諸燥有聲其脉浮濡而短列諸咳藥選而用

假令腎病

實邪寒風相合臟不藏散下利純清其脉沉滑而弦
仲景云少陰證口燥咽乾下利純清大承氣湯主之
脉弦仲景云膈逆冷者宜四逆湯等○虛邪寒清相
合腎唾多呻洒淅寒清無寐經言燥化清其脉沉實
而濡酸棗仁湯主之○賊邪寒濕相合腎為胃關關

閉水溢關閉水在胃為腫水在肺為喘及變諸證其
脉沉緩而大仲景云大病差後腰下有水氣者牡蠣
澤瀉湯主之○微邪寒熱相合膀胱熱鬱津液枯少
其脉沉濡而大內經曰水少乾涸也猪苓湯主之○
正邪寒自病寒怱用臟黑痺經沉濡而滑黑痺天麻
丸如證同脉異微者腑病也甚者臟病也

五臟各有身熱

夫五臟者有邪各有身熱其狀各異以手捫摸有三法

以輕手捫之則熱重按之則不熱是熱在皮毛血脉也
重按之至筋骨之分則熱蒸手極甚輕手則不熱是邪
在筋骨之間也輕手捫之不熱重加力以按之不熱不
輕不重按之而熱是在筋骨之上皮毛血脉之下乃熱
在肌肉也此為三法以三黃丸通治之細分為五等

肺熱者輕手乃得但微按全無是瞥瞥然見於皮毛
之上日西尤甚乃皮毛之熱其證必見喘咳洒淅寒熱
輕者瀉白散重涼膈散白虎湯地骨皮散○心熱者

心主血脉微按至皮膚之下肌肉之上輕手乃得微按至皮毛之下則熱少加力按之則全不熱是熱在血脉也日中大甚乃心之熱也其證煩心心痛掌中熱而噦以黃連瀉心湯導赤散硃砂安神丸清涼飲子○脾熱者輕手捫之不熱重按至筋骨又不熱不輕不重在輕手重手之間熱在肌肉遇夜尤甚證必怠惰嗜卧四肢不收無氣以動瀉黃散調胃承氣湯治實熱用之人參黃芪散補中益氣湯治中虛有熱

者用之。○肝熱者重按之肌肉之下至骨之上乃肝之熱寅卯間尤甚其脉強四肢滿悶便難轉筋多怒多驚四肢困熱筋痿不能起於床瀉清丸柴胡飲子。○腎熱者輕手重手俱不熱如重手按於骨分其熱蒸手如火其人骨蘇蘇如虫蝕其骨困熱不任亦不能起於床滋腎丸六味地黃丸。

普濟方卷十三